



partii naleraq

13.maj 2019

UPA2019/222

Kalaallit Nunaanni immap naasuinik pitsaanerusumik tunisassiornissaq anguniarlugu, kiisalu annertunerusumik pisuussutit atorluarneqarnissaat pitsaanerusumillu periarfissiuunnarlugit apeqquteqaat aallaavigalugu oqallisissiatut siunnersuut. (Inatsisartuni ilaasortaq Jens Napaattoq, Partii Naleraq)

(Inuussutissarsiornermut Nukissiuuteqarnermut Ilisimatusarnermullu Naalakkersuisoq)

Inatsisartunut ilaasortaq Jens Napätôk', Partii Naleraq siunnersuuteqarpoq oqallisissiamik tassalu Kalaallit Nunaanni immap naasuinik pitsaanerusumik tunisassiornissaq anguniarlugu, kiisalu annertunerusumik pisuussutigut atorluanerunissaat pillugu tamannalu oqaaseqarfigissavarput.

Itsaaniilli tamatta ilisimavarput immap naasui peqqinnartuusut ukiorpassuarnilu vitaminiit minguiulluinnartut nerisarisarsimavagut, ajoraluartumillu ukiuni makkunani tamakkiisumik atorneqaratik annikitsuinnarmik atuisartut eqqaassanngikkaanni.

Nunatsinni pisuussutitta tamakkiisumik atorluarneqarnissaat minnerunngitsumillu nunaqavissunik iluaqutigineqarlutik atorluarneqartarnissaat ullumikkornit piumassuseqarfiginerullugu aalluttariaqaripput ataatsimoorluta isumaqatigiissutigisariaqarparput.

Ilaatigut nunatsinni periarfissanik nutaanik ammaaniarnermi soorlu nioqqutissiornikkut niuersinnaanerit eqqarsaatigalugit ilaatigut immaqa sukangavallaartunik aammalu annasaqarsinnaanermut ersinermik pissuteqartumik aallartitsiniartut aporfissaqartippallaartarpagut, nutaamik nioqqutissiornissat immaqa ilaatigut tunulluuttoortarlugit annasaqarsinnaanerput salliutippallaartarlugu tamanna illuanut saatsitariaqarpoq sapiisernerulluta nutaanik ammassisinnaanerput periarfissarsiunniartigu.

Naalakkersuisut saqqummiussaanni akissuteqaammi soqutigintumik oqaariartuuteqarput, tassalu immap naasui nunarsuarmi niuerutigineqartut qaffakkiartuinnartut, taava uagut aamma malinnaanerusariaqalerpugut. Aporfissat piunnaarlugit periarfissat annertusartariaqalerpugut inuussutissarsiornikkut suliffissatigullu nunaqarfiit illoqarfiillu isigalugit.

Taavalu ulluinnarni suliffinnik pilersitsiniarnermi sumiiffimmi najukkami sullissinerit ingerlasariaqarput, tassani pivagut kommunit inuussutissarsiornikkut allaffeqarfii aamma ilanngullugit nukittorsartariaqartut, tassami aqutsinerup qitiusumik ingerlattuarnera pillugu aporfissarparujussuit pilersinneqartarput, ilaatigut pilersitsiniartut nukillaartuinnarnerannik kinguneqartarlutik.

Nunarsuarmi immap naasuinik nioqqutissiorneq annertusiartuinnarpoq sulilu ukiut tamaasa qaffakkiartuinnarluni atuineq. Tamannalu nunatsinni minguitsumik avatanngiiseqartumi

imartaqartumilu annertusarlugu aallartitariaqarparput suliffissammi aningaasallu nutaat pisariaqartippagut uagutsinnut napatinnerulissagutta.

Qeqqusanik nioqqutissiornissaq aallartissappat pilersaarutit sukumiisumik suliarisariaqarput. Paneersiviit poortuiviit illut pisariaqartippagut, pingaartumik inuussutissalerinermi piumasaqaatinut naammassinnittut. Aammalu assartuinermi poortuutissat assigisaallu ilanngullugit isumannaartariaqarput.

Inatsisartut inuussutissarsiornermut ataatsimiititaliaat kaammattorniarpaput suliniutit nutaat tamakkua aallartisarnissaannut eqqumalluaqqullugit. Aammalu paasisassarsioqqullugit taamatut pilersaaruteqartunik misilittagalinnillu ilaqaarlutik nunanut immap nassuinik nioqqutissiortunut angalaqqullugit. Nunarsuup sinnerani qaffakkiartuinnartumik iluaqutigineqariartuinnartut isigiinnarnagit aamma uagut sukataarnerusariaqalerpugut, tassanilu aamma Naalakkersuisut soorunami peqataanissaannut siuarsaanissamullu saneqqunneqarsinnaanngillat.

Aningaasaliissutit nutaat taakkartorneqartut neriuppugut malittassaat sukangavallaassanngitsut, tassami piumasaqaatit sukangavallaarpata aamma alloriarnissaq killeqartorujussuussaaq, soorlu taamak aallartitsiniartut ukiut siuliini aallartitsisaraluartut unittuinnarnerannik kinguneqartartut.

Oqaatigeqqissavarput kommunit inuussutissarsiornikkut ingerlatsivii tassani aamma ikiorsiiniartarnerannik tusaaniarneqarlutik peqataatsinneqartassasut kammattuutigeqqissavarput.

Suliniutit nutaat aningaasarsiornikkut suliffissatigullu kivitsinissamik anguniaqartut ataatsimoortumik illersortariaqarpagut taamaliunngikkuttami aamma allat saneqqutiinnarluta iliuseqassapput nunatsinnut tamakkiisumik iluaqutaanngitsumik.

Taamatut oqaaseqarluta oqallisissiamut saqqummiussaarpugut.

Hans Enoksen